

## **BASES REGULADORAS DA CONVOCATORIA DE RENOVACIÓN DAS MATRICULAS NAS ESCOLAS DEPORTIVAS MUNICIPAIS PARA O CURSO 2020-2021**

Por esta concellaría préstase conformidade ás bases da convocatoria das renovacións das matrículas nas Escolas Deportivas Municipais (en diante EDM) do Servizo Municipal de Deportes (en diante SMD), segundo a normativa de uso das instalacións deportivas, EDM e outras actividades (aprobada pola Xunta de Goberno Local o 20 de xullo de 2007).

### **1. OBXECTO**

Constitúe o obxecto destas Bases as renovacións das matrículas nas EDM así como as renovacións que se produzan nos casos de cambio de grupo por idade, cambios das horas que se pretenda renovar motivados por conciliación laboral ou persoal e as situación de AGÁS por non dispoñer en primeira instancia de praza.

Ademais estas bases regularán os casos que se poidan producir durante o curso por solicitudes derivadas de cambios de grupo, falta por conciliación ou enfermidade grave ou moi grave, así como a porcentaxe de asistencia obrigatoria ás EDM durante o curso 2020-2021.

Todas a publicacións relativas a este proceso faranse polos seguinte medios:

- Na páxina web municipal [www.coruna.gal/deportes](http://www.coruna.gal/deportes).
- Nos taboleiros de anuncios das instalacións deportivas municipais.

Asimismo, poderase obter información no teléfono de información da cidadanía 010.

### **2. SUXEITOS**

A convocatoria vai dirixida a todo o alumnado matriculado nas EDM no curso 2019-2020, tanto as xestionadas directamente pola concellaría de Deportes como as que se xestionan a través das empresas concesionarias do Complexo Deportivo Municipal de San Diego e da Piscina Municipal de San Amaro, sempre e cando o dito alumnado desexe renovar a súa matrícula para o curso 2020-2021.

### 3. NORMAS RELATIVAS Á RENOVACIÓN

#### 3.1 DEREITO Á RENOVACIÓN – RESERVA DE PRAZA

Debido á situación producida pola declaración do Estado de Alarma como consecuencia do COVID-19 -o cal dou lugar a que se tivesen que suspender temporalmente as Escolas Deportivas Municipais- e tendo en conta que non se pode na actualidade realizar concentracións de xente en espazos públicos, e co fin de garantir a continuidade nas EDM do alumnado matriculado na actualidade, para o curso 2020-2021 **terán dereito a renovar nas EDM todas as persoas matriculadas na actualidade.**

O dereito a renovación é independente da porcentaxe de faltas de asistencia que se tiveran durante o curso 2019-2020 e poderá renovarse sempre e cando esa actividade teña continuidade no próximo curso e a persoa cumpra coa idade e condición física necesarias para realizar a actividade.

Publicarase unha listaxe de todas as actividades das EDM e dos alumnos/as aos que se lle vai reservar a praza para o seguinte curso.

Non obstante, realizaranse chamadas dende o SMD ás persoas cuxa porcentaxe de faltas de asistencia sexa moi elevada á data de suspensión das actividades para comprobar se desexan renovar nesa actividade. Se esa persoa manifesta que non desexa renovar, non se lle reservará a praza.

No caso de que deba realizarse un cambio de grupo por idade ou nos casos de AGÁS, as coordinadoras das EDM asignaranlle unha actividade a esas persoas noutro grupo sempre e cando iso sexa posible.

A listaxe publicarase do 1 ao 14 de xullo de 2020 e contra a dita listaxe poderanse efectuar as alegacións que se estimen oportunas durante ese prazo. Ao mesmo tempo, as persoas interesadas poderán chamar ao número 981 18 98 00 e consultar o estado da súa renovación.

#### 3.2 PAGO DA TAXA CORRESPONDENTE

Para que a renovación sexa efectiva o alumnado deberá pagar a taxa correspondente de acordo co previsto na Ordenanzas Fiscal número 15 do Concello da Coruña.

A Ordenanza contempla tarifas reducidas por rendemento económico ou IPREM, para o cal deberán aportar a documentación preceptiva **con carácter previo á data de matriculación.**

O pago da taxa poderá realizarse dende o día **6 de xullo de 2020 ata o día 21 de agosto de 2020**, no Rexistro do Palacio dos Deportes de Riazor, en horario de atención ao público de 08:00 a 13:30 horas, excepto na primeira semana completa de agosto (Semana Grande) onde o horario será de 08:00 a 12:30 horas.

Ademais, habilitarase un horario de rexistro extraordinario pola tarde, en horario de 17:00 a 21:00 horas, do **6 ao 17 de xullo de 2020**, de luns a venres.

Para pagar a taxa a persoa **só terá que acudir ao rexistro co NIF e co importe exacto de acordo coa táboa que se publica.**

### **3.3 RENUNCIA Á PRAZA**

As persoas que a día 21 de agosto de 2020 (ás 13:30 horas) non fixeran o pagamento da taxa correspondente entenderase que renuncian á praza na que podían renovar. A dita praza pasará á convocatoria libre e ofertarase no mes de setembro de 2020.

En todo caso, unha persoa que renunciou ou que non renovou unha praza por calquera circunstancia sempre vai poder optar a convocatoria libre por esa ou por outra que saia ofertada.

### **3.4 LIMITACIÓN NO NÚMERO DE ACTIVIDADES POR ALUMNO/A**

Para o curso 2020-2021 establécese a limitación dun máximo de dúas matrículas por alumno/a das EDM (incluíndo todas as actividades realizadas en calquera das IDM). Esta limitación refírese aos casos de renovación nas escolas e de matrícula nova en setembro.

Non obstante, no caso de que durante o curso queden prazas libres, se as ditas prazas se chegasen a convocar pola Concellaría de Deportes, poderanse matricular alumnos/as que xa estean matriculados/as en dúas actividades.

Rematado o curso escolar, cando se vaian realizar as renovacións, o alumnado que supere as dúas matrículas deberá elixir só dúas actividades para renovación.

Exceptúanse desta regra as actividades de recuperación funcional de forma temporal e os casos de natación prenatal.

### 3.5 LUGAR E DATAS DAS RENOVACIÓNS

#### RENOVACIÓN NAS ESCOLAS DEPORTIVAS MUNICIPAIS DE SAN DIEGO E SAN AMARO

As renovacións ordinarias nas EDM impartidas en San Diego e San Amaro faranse nos devanditos centros dentro do horario de atención ao público destes centros, durante os meses de xullo e agosto de 2020 (**do 6 de xullo ata o 21 de agosto de 2020**).

As renovacións que deban producirse como consecuencia dun cambio de grupo por idade ou por un AGÁS faranse do 31 de agosto ao 4 de setembro de 2020, no mesmo horario.

#### RENOVACIÓN NAS ESCOLAS DEPORTIVAS MUNICIPAIS XESTIONADAS DIRECTAMENTE POLA CONCELLARÍA DE DEPORTES

Teñen o carácter de EDM xestionadas directamente pola Concellaría de Deportes aquelas escolas que se imparten nas instalacións deportivas municipais de xestión directa.

As renovacións ordinarias das matriculas nas EDM xestionadas directamente pola Concellaría de Deportes farase no **Palacio dos Deportes de Riazor**, en horario de atención ao público, durante os meses de xullo e agosto (**do 6 de xullo ao 21 de agosto de 2020**).

O horario de renovación será:

De luns a venres de **08:00 a 13:30 horas**, excepto a primeira semana completa de agosto (Semana Grande) que será de **08:00 a 12:30 horas**.

A maiores ábrese un horario extraordinario de tarde do 6 ao 17 de xullo (de luns a venres), de **17:00 a 21:00 horas**.

As renovacións que deban producirse como consecuencia dun cambio de grupo por idade ou por un AGÁS faranse do 31 de agosto ao 4 de setembro de 2020, no mesmo horario, excepto para o caso do horario de tarde.

### 3.6 TIPOS DE RENOVACIÓNS E NORMAS XERAIS

A renovación realizarase no horario e grupo no que se estea inscrito/a no curso 2019-2020.

Non obstante, o SMD poderá cambiar a denominación dos grupos e ampliála co fin de ordenar as actividades das Escolas Deportivas Municipais. Neste caso, cada persoa quedará adscrita a un grupo equivalente ao que estaba matriculada.

En consecuencia todo o alumando renovará na súa mesma praza.

#### 3.6.1 RENOVACIÓNS ORDINARIAS

Formalizarase co pago da taxa correspondente entre os días 6 de xullo de 2020 e o 21 de agosto de 2020, en horio de atención ao público nos Rexistros do Servizo Municipal de Deportes ou nas oficinas de atención ao público de San Diego e San Amaro.

#### 3.6.2 CAMBIOS DE GRUPO POR IDADE E AGÁS

**Cambio de grupo por idade:** Sempre que se reúnan todos os requisitos establecidos, permitirase a continuación na mesma modalidade deportiva de EDM ao alumnado que por idade deba cambiar de grupo, a condición de que sexa posible polo número de prazas existentes. En razón a iso, exceptúanse os grupos correspondentes a **(clasificados como AGÁS)**:

Alumnado de Natación de 9 a 11 anos, con cambio a Natación de 12 a 17 anos. (Piscina Municipal de Riazor)

Alumnado de Ximnasia de 9-11 anos, con cambio a Ximnasia de 12-17 anos. (Polideportivo da Sagrada Familia)

Alumnado de Tenis de 9-11 anos, con cambio a Tenis de 12-17 anos. (Novo Mesoiro)

Alumnado de Patinaxe de 6-8 anos, con cambio a Patinaxe de 9-11 anos. (Polideportiva número 1 de Riazor)

Alumnado de Minitenis 6-8 anos, con cambio a Tenis 9-11 anos. (Cidade Deportiva da Torre)

**AGÁS EDM:** o alumando dos grupos numerados como AGÁS intentarase colocar en grupos con prazas dispoñibles.

No caso de que non se poidan colocar todos/as os/as alumnos/as que están en situación de AGAS, realizarase un sorteo e publicarase o resultado. As persoas que non obteñan praza poderán acudir a convocatoria libre no mes de setembro.

O procedemento do sorteo (sempre e cando sexa necesario) será o seguinte:

- Ordenarase por orde alfabética de apelidos. No caso de apelidos compostos ou con preposicións, só se terá en conta a primeira letra do apelido composto e non se terá en conta nunca a letra pola que empeza a preposición.
- Sacaranse dúas letras ao azar, sendo a primeira letra extraída a que corresponda co primeiro apelido e a segunda extraída a que corresponda co segundo apelido.
- Cubriranse as prazas libres seguindo as orde alfabética que corresponde en función das letras extraídas.

As renovacións nestes casos farase, unha vez publicada a listaxe ou acordado co alumnado o grupo no que se vai incluír, entre os días **31 de agosto e 4 de setembro de 2020**, en horario de atención ao público nos Rexistros do Servizo Municipal de Deportes ou nas oficinas de atención ao público de San Diego e San Amaro.

### 3.6.3 NORMAS XENÉRICAS

a. Non se permiten solicitudes de cambio de modalidade deportiva nin de cambio de horario.

b. Idade: A efectos de renovación considérase a idade referida a data 31 de decembro de 2020.

c. Calendario: todas as EDM adaptaranse ao calendario oficial escolar publicado pola Xunta de Galicia; en todo caso, o curso comezará o primeiro día hábil de outubro e rematará o último día hábil de xuño.

Non obstante, a Concellaría de Deportes poderá ampliar este calendario e organizar novas actividades ou cursillos.

**No curso 2020-2021, como consecuencia das obras que se deben acometer na Piscina Municipal de Riazor, o curso correspondente a todas as modalidades de natación e de recuperación funcional que deban desenvolverse nesa instalación**

**deportiva, comezará o día 1 de xaneiro de 2021. O alumnado só deberá pagar a parte proporcional da taxa correspondente.**

d. Para os grupos de 9-11, 12-17, +18 e + 60 intenso e requisito para matricularse nas EDM de natación saber nadar 25 m. sen tocar fondo nin suxeitarse a medios auxiliares fixos ou móbiles. Para o grupo de natación +18 intenso é preciso saber nadar 100 metros empregando dous estilos.

e. Para os grupos de natación de 6-8 e +60 iniciación, non é requisito saber nadar.

f. O SMD por motivos técnicos, pedagóxicos, organizativos ou outras circunstancias concorrentes, resérvase a facultade de re-axustar os grupos e -se fose necesario- deixalos sen efecto.

g. Farase un control do uso responsable das EDM, segundo as normas de uso das instalacións deportivas municipais, EDM e outras actividades aprobadas pola Xunta do Goberno Local do 20 de xullo de 2007.

h. O Concello dispón dun servizo gratuíto de asistencia médica e hospitalaria, ata un máximo de 180 días, para o alumnado das escolas deportivas que sufra un accidente durante a clase e como consecuencia de levar a cabo a actividade proposta polo técnico responsable da mesma. En ningún caso a prestación deste servizo suporá recoñecemento de responsabilidade municipal sobre a lesión sufrida; senón que o mesmo debe incardinarse na vontade desta administración de implantar unha practica deportiva segura e de calidade, que teña activado en todo momento un protocolo que garanta unha atención, inmediata e a curto prazo, da persoa accidentada con servizos especializados en medicina deportiva.

i. A persoa solicitante e, no seu caso, quen ostente a súa garda e custodia ou tutela, declarará baixo a súa responsabilidade que son certos os datos facilitados. No caso do que o SMD detecte falsidade nos devanditos datos, a persoa causará baixa sen dereito á devolución das taxas aboadas.

j. Serán de aplicación as normas de uso das Instalacións Deportivas Municipais, EDM e outras actividades aprobadas pola Xunta do Goberno Local do 20 de xullo de 2007.

k. O SMD resérvase a facultade de interpretar e valorar as circunstancias concorrentes en cada caso.

l. De conformidade co establecido no artigo 5 da Lei Orgánica 15/1999 os datos de carácter persoal declarados pasarán a formar parte do ficheiro denominado **INSTALACIÓNS DEPORTIVAS**, do que será responsable do tratamento o Concello da Coruña (e, no seu caso **SIDECU GESTIÓN, S.A.** e **CLUB DEL MAR DE SAN AMARO**, concesionarias –respectivamente- do **CDM San Diego** e da piscina municipal de San Amaro), e cuxas finalidades e usos previstos serán os seguintes: xestión centralizada das instalacións deportivas municipais, das actividades impartidas nas mesmas e do uso de instalacións. Coa sinatura da solicitude autorízase a tomar imaxes das actividades que se realicen nas Escolas Deportivas sempre que se utilicen para a promoción e difusión de devanditas actividades. Os dereitos de acceso, rectificación, cancelación e oposición aos datos persoais rexistrados neste ficheiro poderanse exercer, segundo os supostos, ante o Rexistro Xeral do Concello da Coruña (Praza de María Pita, 1), **SIDECU GESTIÓN, S.A.** (Parque de San Diego, S/N) e **CLUB DEL MAR DE SAN AMARO** (Paseo do Club do Mar S/N) nos termos establecidos nos artigos 15, 16 e 17 da devandita Lei Orgánica.

m. Coa presentación da solicitude entenderase que o alumnado inscrito e, no seu caso, o seu pai/nai ou titor/a autoriza a utilización do móbil e correo electrónico como forma de aviso e comunicación por parte do SMD.

## **4 NORMAS DE ASISTENCIA DURANTE O CURSO ESCOLAR 2020-2021**

### **4.1 ASISTENCIA OBRIGATORIA**

Establécese unha porcentaxe de asistencia obrigatoria nas EDM do 60% das sesións lectivas do curso escolar.

O alumnado só poderá, polo tanto, ter unha porcentaxe de falta inferior ao 40% do total das sesións anuais do curso. Esta situación deberá ser excepcional, debendo o alumnado, como norma xeral, asistir ás clases.

Non se requirirá que o alumnado presente un xustificante pola súa falta de asistencia. Non existindo distinción entre falta xustificada e non xustificada.

**No caso de que se chegue ao 40% de faltas de asistencia o/a alumno/a debe causar baixa nas EDM sen dereito a percibir a devolución da correspondente taxa.**



## **4.2 CASOS DE FALTA DE ASISTENCIA POR ENFERMIDADE GRAVE OU MOI GRAVE**

Excepcionalmente e por causa de enfermidade grave ou moi grave, poderase permitir que o alumando renove nas EDM a pesar de superar esa porcentaxe de falta de asistencia do 40% sempre e cando esa circunstancia se xustifique debidamente ante o Servizo Municipal de Deportes.

O alumando que se atope nesa situación durante o curso escolar deberá acudir ante o SMD para valorar a situación de cada caso concreto. Nestes casos solicitarase unha cita por teléfono ou a través das coordinadoras das EDM co Director da instalación deportiva onde asiste á actividade.

Poderase chamar ao teléfono 981 18 98 00, extensións 25139.

## **4.3 CASOS DE FALTA POR MOTIVOS DE CONCILIACIÓN LABORAL E FAMILIAR**

Nos casos de que non se poida asistir ás EDM por motivos familiares ou laborais xurdidos unha vez formalizada a matrícula nas EDM, o/a alumno/a deberá poñelo en coñecemento do SMD e solicitar, se é posible, un cambio de grupo.

Esta circunstancia debe estar debidamente motivada.

## **5. NORMAS ESPECÍFICAS MOTIVADAS POLA COVID-19**

Debido á situación de emerxencia sanitaria motivada pola Covid-19 e co fin de garantir a seguridade das persoas que van realizar as renovacións, establécense as seguintes normas:

### **5.1 Obriga de solicitar cita previa:**

O alumnado deberá solicitar cita previa antes de acudir ao rexistro do Palacio dos Deportes de Riazor. Poderase solicitar cita previa chamando aos seguintes teléfonos:

De luns a venres, en horario de 08:00 a 14:00 horas:

**981 18 42 00, extensión 88408**

**981 18 42 00, extensión 88409**

De luns a venres, en horario de 16:00 a 21:00 horas:

**981 18 42 00, extensión 25139**

Programarase unha cita previa cada 5 minutos e por matrícula. Unha mesma persoa pode solicitar varias citas para formalizar varias matrículas, de esa persoa ou de familiares.

Deberase acudir á cita con puntualidade, de tal forma que non se formen colas.

### **5.2 Obriga de pagar con importe exacto:**

Para evitar contaxios, o alumnado deberá acudir ao rexistro co importe exacto da taxa que debe pagar.

Para iso publicarase unha táboa na páxina web [www.coruna.gal/deportes](http://www.coruna.gal/deportes) onde figuran todos os importes en función da idade.

### **5.3 Outras obrigas:**

- No momento de espera para acceder á instalación deberase gardar a distancia obrigatoria de 1,5 metros.
- E obrigatorio levar máscara en todo momento.
- Antes de entrar na instalación tomarase a temperatura da persoa que acuda ao rexistro, e non se lle deixará pasar se presenta unha temperatura de 37.5 grados.
- E obrigatorio desinfectar o calzado na entrada da instalación, nunha alfombra habilitada ao efecto.